

Худудлар кесимида хизматлар соҳасининг ривожланиш кўрсаткичлари ҳамда чакана савдо айланмасининг ўсиш суръатлари тўғрисида

Пресс-релиз

Хизматлар соҳаси

Бугунги глобал бозор иқтисодиёти шароитида хизматлар соҳаси ривожланган мамлакатлар миллий иқтисодиёти таркибида муҳим рол ўйнаши хеч кимга сир эмас.

Жумладан, Ўзбекистон Республикасида ҳам ушбу соҳа алоҳида аҳамият касб этиб келмоқда. 2019 йил январь-март ойларида республикамизда кўрсатилган хизматлар ҳажми 40,2 трлн.сўмни ташкил этиб, ўтган йилга нисбатан 11,1 фоизлик ўсиш кўрсаткичини қайд этди.

Шунингдек, 2019 йил 1 январ ҳолатига, мамлакатимизда фаолият кўрсатаётган 323,5 мингта ташкилот ва корхоналардан 213 мингга яқини хизматлар соҳасида фаолият кўрсатмоқда.

Кўрсатилган хизматларда энг катта ҳажм Тошкент шаҳрида (12 989,9 млрд.сўм), энг кичик ҳажм Сирдарё (543,2 млрд.сўм), Жиззах (849,6 млрд.сўм) ва Навоий (1009 млрд.сўм) вилоятларида кузатилди.

Сўнгти йилларда аҳоли жон бошига кўрсатилган бозор хизматлари ҳажмининг ҳар ойда ўсиш тенденцияси кузатилиб келинмоқда, жумладан, ушбу кўрсаткич ўтган йилнинг мос даврига нисбатан 234,3 минг сўмга ошиб, 2019 йилнинг январь-март ойларида 1 203,5 минг сўмни ташкил этди.

Кўрсатилган бозор хизматлари умумий ҳажмининг деярли учдан бир қисмини транспорт хизматлари ташкил этиб, унинг улуши 2019 йилнинг январь-март ойларида 30 фоизни ташкил этди. Шу билан бирга, энг юқори улушларни савдо хизматлари (25,5 %), молиявий хизматлар (16,8 %), алоқа ва ахборотлаштириш хизматлари (5,5 %) эгаллади.

2019 йилнинг январь-март ойларида савдо хизматлари ҳажми 10 258,2 млрд.сўм бўлиб, кўрсатилган хизматлар умумий ҳажмидаги улуши 25,5 фоизни ташкил этди.

Чакана савдо

Республика бўйича жорий йилнинг январь-март ойларида чакана савдо товар айланмаси 32,8 трлн. сўмни ташкил этиб, ўтган йилнинг шу даврига нисбатан 5,9 %га ўсади. Шу жумладан, йирик корхоналарнинг товар айланмаси 5 021 млрд. сўмни, кичик тадбиркорлик субъектларининг товар айланмаси 24 517,1 млрд. сўмни, уюшмаган савдо товар айланмаси 3 301,3 млрд. сўмни ташкил этди.

Чакана савдода энг катта ҳажм Тошкент шаҳрида (7 380,4 млрд.сўм), энг кичик ҳажм Сирдарё (671,5 млрд.сўм) ва Жиззах (1 095,3 млрд.сўм) вилоятлари ҳамда Қорақалпоғистон Республикасида (1 125,1 млрд.сўм) кузатилди.

2019 йил I-чорагида чакана савдо товар айланмаси республика бўйича аҳоли жон бошига 984 минг сўмни ташкил қилиб, ўтган йилнинг шу даврига нисбатан 4,5 %га ошган. Чакана савдо товар айланмасининг аҳоли жон бошига нисбатида ўтган йилнинг мос даврига нисбатан республикамизнинг барча худудларида ўсиш кузатилган бўлиб, энг юқори кўрсаткичлар Тошкент шаҳри (2 925,5 минг.сўм), Навоий (1 325 минг. сўм) ва Тошкент (1 124 минг.сўм) вилоятлари ҳиссасига тўғри келади.

Иқтисодиёт ва саноат вазирлиги Ахборот хизмати